



# Tir Yimyim

www.tiryimyim.in

Regd. No. RNI. NAGAAO/ 2004 / 13113. Postal-NE/RN-717.

e-mail : tiryimyim@gmail.com

TAPAK 7

Yangia anidakangma :



Tir Yimyim



tir\_yimyim



tir yimyim

TAPAK 8

**Sheikh Hasina-i tasa junga yanglur longkak aiter amak**

**Champions League final: PSG-i goal 5-0 agi Inter Milan kokogo**



VOL. XXII ISSUE NO. 228 (ADOK 228)

DIMAPUR

TENTONÜ (MONDAY)

AAMI (JUNE) 02, 2025

₹ 5.00

## IMDH Mokokchung nung face masks agitsü tuyur

**Dimapur, June 1, 2025 (TYO):** India nung COVID-19 variant tasen ka putetba sülen Dr Imkongliba Memorial District Hospital (IMDH), Mokokchung nung staff ajaki face masks enoktsü tetuyuba agütsüogo.

IMDH nung hospital staff dak alia shirangertem aser parnok anepalur ajaki face masks enoktsüla ta Medical Superintendent Dr. Ademla Tinu-i sangdong ka nung

metetdaksüogo.

Laisa IMDH nung wards, OPDs, aser units ajak dang shirangertem aser parnok anepalutem dang iba tetuyuba ama inyakdakjang ta ashi.

India nung COVID variant tasen ka putetba sülen linük ajungalen health ketdangsürtemi tensa dak tenük yoka repringdar aser mozü ki aika nung COVID-appropriate behavior tanaben tenzükshiogo.

## Pune teküp ayokdak nungi Nagaland nungi dena tetsür 5 kümzük

**Pune, June 1, 2025 (Agencies):** Pune police-i Kharadi tesem nung massage parlour ka ama sayua teküp ayokba maparen inyakba ka makdokogo.

Iba mapang police-i Nagaland, West Bengal, aser Rajasthan nungi tetsür pungu kümzük. Police-i parlour kibur aser manager anema ken o benokogo.

Iba ken o atema tai tonglokja alisangji Kafeel Uddin (30) ta jangjaogo aser pa ya Jamunamukh, Assam nungi lir. Ano massage parlour nung manager inyakerji tanur ka lir saka pa anema-a ken o balaka benokogo.

Kharadi nung ki ka nung lapoka aliba massage parlour ka

nung teküp ayokba maparen inyakba osang Pune police nem sangokja liasü. Iba nung ajemdaker police-i decoy customer ka yok aser iba sülen mita ao.

Tetsürtem nem sen agütsütsü ta mesüka teküp ayokba maopa inyakdaksü. Police-i iba parlour nungi tetsür pungu anizükogo aser tanur manager ji pua lir.

Iba mapa ya Kharadi Police Station nung Senior Police Inspector Sanjay Chavan lenisüba kübok Sub-Inspector Monali Bhade, Navnath Valke, Surendra Sable, Amol Bhise, Mahesh Nanekar, Vaishali Khedekar, Pooja Dahale, aser Komal Wakchaure nungeri inyak.

## Manipur tzümetsüng ya 'state calamity' lir: Congress

**Imphal, June 1, 2025 (Agencies):** Manipur Pradesh Congress Committee (MPCC)-i Manipur Governor dang state nung tzümetsüng tensa ya 'state calamity' ta sangdongtsü ayongzükogo.

"Iba sangdong ajanga tanü ajurua aliba tensa atema dang masü saka tarutsü atema institutional measures tenzüka otettsü" ta Congress lennir aser Lok Sabha MP Bimol Akoijam-i Governor dangi shidi ka zülüogo.

Iba ama sangdong ka ajanga department balala tsüngda amalitepa mapa inyakettsü aser senotsü bushitettsü ta pai ashi.

India Meteorological Department-i maneni tzünglu kanga arutsü ta orange alert sangokja lir anungji tang ajurua aliba tensa ya tetenzüker dang aser iba den tamajungba ajurutsü ta MP Akoijam-isa ashi.

Manipur kübok district kar nung tzünglu kanga aruba aser tzümetsüng timtem ajurua aliba ajanga Government, Government-Aided, aser Private Schools ajak summer holidays

atsülangogo.

Iba ya Imphal East district, Imphal West district, aser Senapati district kübok Senapati Sub-Division atema lir.

Item shisaliok rejutem nung summer vacation ji May 30, 2025 nü tembang aser school ketdangsürtemi June 2, 2025 nungi class tenzüktsü sangdonga liasü.

Ajisüaka, Manipur Governor Ajay Kumar Bhalla-i Deobarnü tetuyuba ka nung Deputy Commissioner tem dang parnok telongtet nung school tem shibangtsü mesüra lapoktsü telemtetba agitsü shiogo.

Governor-isa districts/zones nung Zonal Education Officer dang pei pei Deputy Commissioner den asüngdangteper anogoshia sorkar nem osang agütsütsü tetuyuba agütsüogo.

Directorate of Education (S), Manipur-i Control Rooms lapoka lir aser Additional Director (Valley) aser Additional Director (Hills)-i Nodal Officers ama inyaker ta Governor Bhalla-isa ashi.

## MPC-i DIPR dang journalism akangshitsü ayongzük

**Dimapur, June 1, 2025 (TYO):** Mokokchung Press Club (MPC)-i Department of Information and Public Relations (DIPR) dang Media Literacy and Ethics sentongtem agia journalism akangshitsü shidi ka zülüogo.

Nagaland nung digital media kanga ainba mapang nübortemi professional journalism aser unregulated media content tsüngda terata adoka lir anungji iba tebilemtsü koktetsü atema Department-i maparen kar inyaktsüla ta MPC-i ashi.

Nagaland nung social media amshirtem, YouTubers, content creators, informal WhatsApp aser Facebook groups aser 'media' ta tenüng amer osangtsüsang prokshiba ajanga nübortem ratadaksür aser aiben koba shitak mesüra tai

mebendangteter ta MPC-i DIPR Director dangi züluba shidi nung shia lir.

Tanü digital media putu nung nisung mashii kati osangtem prokshir, aser aiben meshisadangi mesüra tebilemtsü kecha melii dang osang agütsür. Osang karbo public atema tongtipang-a asür saka item nisungtem prokshiba osang ajak chichiba journalism den kasa jenjang nung züngokba ya tim masü aser iba ajang public anisar ta MPC-isa ashi.

Journalism mapa nungbo kuli tejangja bushir, tebilemtsü abener aser editorial standards benshir saka digital media nisungtemi ochi mesüra inyakyim lateta aliba hao melii dang osangtem mashii prokshir. Iba inyakyim ya mazüoki odang yutsüra shinga dak temulung

melemtettsüsa tensa ka ajurutsü aser smartphone abener ajak 'journalist' kaka akümtsü, ta MPC-sa tebilemtsü khuret lemsatepogo.

"Item khuretemtem asoshi DIPR Nagaland-i schools, colleges, churches, aser civil society organizations den yaritepa state-wide media literacy campaign agi nung ajungtsü. Iba maparen ajanga nisungtemi factual reporting & opinion, propaganda, mesüra misinformation tebendang angatettsü" MPC-isa ashi.

DIPR-isa district-level journalists aser local media workers atema training, fellowships, aser workshops ayonga agitsü aser iba ya digital verification, ethics, & public trust in journalism atema asütsüla ta MPC-isa metetdaksüogo.

## NSDMA-i tzümetsüng indang metetdaksür

**Dimapur, June 1, 2025 (TYO):** Nagaland nung tesem aika nung tzünglu kanga aruba ajanga lendenlen ajungben tzümetsüng timtem ajurutsü akok ta Nagaland State Disaster Management Authority (NSDMA)-i

metetdaksüogo.

Iba atema parnoki District Disaster Management Authorities (DDMAs) ajak dang renema alitsü tetuyuba agütsüogo.

Rongdak nüngdak adokra

senotemi State Emergency Operations Centre: 1070 (toll free number); 112 (ERSS extension for Disaster Management); aser 0370-2291120/22 ajanga osang agütsütsü akok ta NSDMA-isa ashi.

## Kohima nung NH-2 anenoka aiba ajanga lenmang shibanger



**Kohima, June 1, 2025 (TYO):** Kohima-Mao lenmang National Highway (NH)-2 nung Phesama anasa ali anenoka aiba ajanga gari senzüba ajunga noktangogo

Tesüiba anogo ishika tzünglu kanga aruba ajanga Deobarnep iba tesem nung ali feet 4 shi anenoka ai.

Iba ya Naga Heritage Village Kisama tsünglanglen lir aser Kohima Deputy Commissioner B. Henok Buchem-i traffic

atema tetuyuba ka agütsüogo.

Manipur nungi Kohima tsütsüi aruba gari tulu ajak Khuzama nung anendaktsütsü ta Kohima DC-i ashi.

Maneni, Dimapur nungi Manipur/Southern Nagaland tsütsüi aoba gari tulutem Sechu Zubza nung anendaktsütsü ta paisa ashi.

Kohima leni aoba Light Motor Vehicles (LMVs) ajak Demori Cove/JCC - Kisama -

Phesama route (one-way only) tsütsü aser Manipur/Southern Nagaland leni aoba LMVs ajak BSF Camp-Chakhabama-Kidima- Viswema-Mao Gate ajanga senzütsü metetdaksüogo.

Kohima DC-isa public dang ali anenoka aiba tesem ajanga mesenzütsü aser talisa electric poles aser live conductors raksaa alidak maotsü metetdaksüogo.

## Advisor Tovihoto Ayemi-i takok angur nem tenüingsang agütsü



*Bhojpuri kin nungi HSCL, HSSLC aser danga tatidang balala nung takok tajung angur nem Deobarnü tenüingsang agütsüba sentong ka Dimapur nung Nagaland Bhojpuri Samaj ajanga ayongzükba nung takok angur den sentong nung tongti tesemdang MLA & Advisor, Tribal Affairs & Election, H. Tovihoto Ayemi aser ketdangsürtem angur.*

**Dimapur, Aami/June 01 (TYO):** Nagaland Bhojpuri Samaj ajanga Deobarnü 13 buba Felicitation Programme ka ayongzükba nung MLA & Advisor, Tribal Affairs & Election, H. Tovihoto Ayemi-i Bhojpuri kin nungi takok tajung ngutetba kaketshir nem tenüingsang agütsü aser parnok dang asüng atema lenirtem ta aja aser maneni pei nükjidong atongtsü merangba nung tasü ita nokdaksü ayongzükba liasü.

Iba sentong ya tawa sangdongba HSLC, HSSLC tatidang aser danga tatidang nung takok tajung nguteter nem tenüingsang agüja ayongzükba liasü.

Iba mapang Bhojpuri kin nungi HSLC aser HSSLC nung toppers 14 den kasa tatidang nung marks shilem 80 aser 85 nguteter kaketshir 25 nem tetushi agüja liasü.

Kasa mapang Chartered Accountancy nung takok angur Sweta Gupta nema tenüingsang agüja liasü.

"Class 10 aser 12 nung toppers, rank holders aser takok tajung ngutetba kaketshir ajunga nem nenoki bendanga agütsür meranga azüngba asoshi akhum agütsür. Nenok sasa nenok tejak tentetba kisüng masü, saka ner tsürabor, schools, kin aser Dimapur yimti ajunga tejak tentetdaksür," ta Advisor Ayemi-i ashi.

"Dimapur ya temeyoktep aliba yimti ka lir aser yimjung aser tangatettep nung aliba tatishitsü takum lir. Sobaliba, kin aser tesem balala nungi nüburtem yangi adenshia alir. Asenoki iba tangatettep mesamadaksütsüla, kati ka akumtsüboa aser amalitepa anogoshi alitsüla," ta pai ashi.

Nenok tarutsü tia indang

mejangjai lir, saka nenoki mapa tulu inyaktettsüsa tashi lir aser nenok kechi jangrar aji azüngtsü aser inyaksüla, ta pai ashi.

"Takok anguba ya certificates, medals mesüra züngdangba kisüng masü. Chichiba takok ya anogoshi tejangraba nung mapa tajung inyaksü temulungtetba nung sakba ya lir. Nenoki kechi inyaker, aji nenoki meimra, kechi mapa südir süaka khuret ka ama mebilemtsü saka nü indang mission ka ama bilemtsü," ta Advisor Tovihoto Ayemi-i ashi.

Paisa, "Nenoki tetsükdaksü ajurutsü. Nenoki tamakok ajurutsü. Saka khen tamakok anguba ajanga nü takum otsü meyanglutsüla," ta ashi.

Nagaland Bhojpuri Samaj tir Rajeev Singh-i iba sentong nung tepela o jembia liasü.

## Horti farm Yisemyong nung citrus saplings lema agütsü

**Dimapur, Aami/June 01 (TYO):** Department of Horticulture, Government of Nagaland ajanga M/s Green Cascade, Mokokchung den lungjemer citrus sapling lema agütsüba sentong ka Mokokchung district kübok Horticulture Farm, Yisemyong nung May 30, 2025 nü ayongzükba liasü.

Iba sentong nung tongti tesemdang Ayieno Hibo, Director, Horticulture ajanga jembidang aluyimer den tesendaktep tali tashi itshitsü atema department-i inyakba indang lemsatepa liasü.

Iba sentong yagi commercial citrus cultivation ajungketba kisüng masü saka department-i aluyimer tenzükba nung bendanga agütsüshir, ta lai ashi.

Aluyimer asoshi department indang kishi teti lapoka lir, anungji teyari atema department dangi arutsüla, ta lai ajungshi.

Aluyimer terenlok aliba angutsü imlar, ta lai ashi aser aluyimer temi pei mapa nung takok anguba aser department takok anguba sendaktepa lir, ta ashi.

District Horticulture Officer, Mokokchung, Dr. B Temjenmenla ajanga iba sentong nung jembidang, M/s Green Cascade, Mokokchung ajanga Longleng aser Mokokchung district nung aluyimer nem citrus saplings angati lema agütsüba asoshi pelaba lemsatepa liasü.

Tanü süngjang tong lema agütsüba ya küm ishika nung

tejang tanga aluyimer takum melenshitsü imlar, ta lai ashi.

M/s Green Cascade Mokokchung nungi ketdangsür temi citrus tsünüba nung tajangzük aliba lemsatepa liasü. Aluyimer takum jenjang tajungba kumdaksütsü asoshi ajungmesoa saplings lema agütsüba sentong ya ayongzük ta ashi.

Parnoki aluyimer dang department dang subsidies meshiba nung tatem masütsüla saka technical shisatsü meshitsüla, aser itemji aluyimer terenlok asoshi tongtipang lir ta ashi.

Iba sentong nung Longleng aser Mokokchung district nungi aluyimer 120 nem quality tajung Khasi mandarin citrus saplings meyirijang aika lema agüja liasü.

## CIFRI ajanga aquarium nung ango metsütsü awareness agütsü

**Dimapur, Aami/June 01 (TYO):** Kaketshir nem libajen indang awareness agütsütsü aser fisheries nung tejangraba lidaksütsü nükjidong nung Nagaland tesem balala nung aliba school tem dak tenük yoker iba sentong ya ayongzükba liasü.

Iba sentong nung tongti tesemdang Additional Director of DoF&AR, Lotimenba-i ICAR-CIFRI ajanga mapa tajung inyakba asoshi pelaba lemsatep aser 'indigenous ornamental fish species' temaba jenjangi ajungkettsü tongtipang lir ta shia liasü.

Sorkaria ornamental fisheries aser livelihood development sentong tem maneni yaritsü, ta pai ashi. Dr. Vimezo Kire, Deputy Director, DoF&AR ajanga sentong nung adenertem pela agizükba o jembidang ICAR-CIFRI ajanga inland fisheries development nung shilem agiba aser iba sentong indang nükjidong lemsatepa liasü.

Dr. Simanku Borah ajanga

tayongzükba o jembidang, ICAR ajanga research agiba aser North East region ajunga nung maparen balala inyakba indang rasaa ashi.

Pai school tem dang aquarium fish ayuba ajanga libajen aser tekolok shisatsü nung tajangzük anguba indang sayutsü ajungshia liasü.

School balala nungi iba sentong nung adener temia iba sentong ayongzükba asoshi pelaba lemsatep aser iba yagi kaketshir ajungmesotsü aser aquarium ayutsü ajungshia liasü.

Iba sülen sensaksemba sentong ka alidang scientists aser fisheries nung mongin temi aquarium fish keeping dak sendakba nung tasüngdangba tem langzüa liasü.

Iba sentong ya Dr. B. K. Das, Director, ICAR-CIFRI, Barrackpore aser Rongsennungba, Director, DoF&AR, Nagaland aser Dr. S. K. Majhi, Head of ICAR-CIFRI Regional Centre, Guwahati lenisüba kübok ayongzükba liasü.

Sentong nung Dr. Anil Kumar Yadav, Senior Scientist aser Dr. Simanku Borah, Scientist aser Imtisunep, District Fishery Officer, Dimapur nunger temi yaritepa liasü.

Sentong tembanga Dimapur, Chümoukedima aser Niuland district tem nungi school 50 nem osetsüset aser ornamental fish lema agüja liasü.

## Naganunger kentener Lushian Lam-i ken kasaya



**Kohima, Aami/June 01 (TYO):** Tebu tem nem akhum agüja kentener Lushian Lam-i "Jü Po, Thaiumei" (Oba, kanga pelar) nüngja agütsür ken ka YouTube nung sayaago.

Iba temulung nung kongshitsü ken ya Khamniungan oshi nung aten aser ibai tebu aser tesem balala nung aliba tebutem nem tenloksüba lir.

Iba ken yagi jala ka aser tebu tena tsüngta temeim aser tesendaktep aliba, aser tenüingsang agütsüba indang ashir.

Iba ken sayaba indang

jembidang, "Iba ken ya kübu indang kisüng masü, saka ola madoki meimba, dangari tenüng asangtsü teimla meyui meranga inyakba obala tem ajunga asoshi lir. Iba yagi aiben mejembiba o ashir," ta lai ashi.

Iba ken ya Nestvibe Studio, Kohima nung record süa yanglu, koba Macnivil-i direct asü aser co-director ya Nchum Patton lir.

"Jü Po, Thaiumei" ken ya YouTube <https://www.youtube.com/watch?v=6VHbcrUb4GY> nung reprangtettsü.



*Competitive exams asoshi renemshia aliba lanurtem den sensaksemba aser kaketshir agütsüba sentong ka Assam Rifles ajanga June 1, 2025 nü Jalukie, Peren district nung ayongzükba liasü. Iba sentong nung Assam Rifles nungi ketdangsür temi lanur 20 (tebur 15 aser tetsür 5) den sensaksema ajungmesoa liasü.*



June 01, 2025 nü Bhopal nung BJP MP Alok Sharma, Mayor Malti Rai aser tangartemi Bhopal princely state longjemba sülen küm 76 ajungba 'Gaurav Divas' amongdang tangokba noksa nung angur.

## Mamata-i Bangladeshi nunger atema arrtsü lapoktsür: Amit Shah

**New Delhi, Aami/June 01 (Agencies):** Union Home Minister Amit Shah-i West Bengal Chief Minister Mamata Banerjee aija, Mamata-i Bangladesh nungi bendangertem linük telungi aittsü atema lenmang lapoktsür aser linük security dang nungibo vote bank tongtibangba kümdaktsür, ta metetdaksü.

Anogo ananü West Bengal semdangba mapang Vijay Sankalp Karyakarta Sammelan sentong nung jembidang Shah-i, "Mamata Banerjee-i Bangladesh nunger atema linük arrtsütem lapoktsüogo. Ozüng alema bendangertem aittaktsütsü atema lai temelaba agütsür. Bendangertem linük telungi aitba Mamata Banerjee-i menokdangteter; Lotus naro sorkari dang ibaji inyaktetsü. Onoki dang dang atsü atsütsü

atema ali meshi saka lai arrtsülen ali magütsür, aser ibaji ajanga bendangertem maneni linük telungi aiter aser la indang vote bank tajungba dang akümer. Lai la sülen lar adianu chir Chief Minister kümdaktsüner, ajisüaka ibaji mataloktsü," ta metetdaksü.

2026 küm West Bengal nung assembly elections agitsü lia Shah-i, Bengal nung elections ajanga Bengali nunger tarutsü tia latetba dang masü saka linük security nunga temelenshi adoktsü, ta metetdaksü.

Mamata Banerjee-i Operation Sindoor anema jembiba dak sendakba nung Shah-i, "Mamata Banerjee-i Pakistan nunger kiralongrartem pusemtsüa akok, ajisüaka ni la dang ya shiner- Ato kilonser Modi-i aniba sorkar aser Operation Sindoor tang tashi lir," ta ashi.

Tawa Murshidabad nung telok ana tsüngda rara adokba dak sendakba nung Shah-i, Trinamool Congress sorkari Hindu nungertem mekümzüktet, ta aitsü.

"Home Ministry-i BSF sepaitem meshiang ta ashi, ajisüaka parnoki meinyak. Iba sülen ozü party nung inyaktertemi High Court ajuruba sülen ang court tetuyuba nung BSF sepaitem arua Hindu nungertem kümzü, ta pai metetdaksü.

Taküm April ita nung Murshidabad district nung Waqf (Amendment) Act, 2025 anema longkak aitba mapang rara adoka nisung aika asüba den külemi kiojen jenti raksaa liasü.

Ano külen Trinamool Congress-ibo, BJP-i yimtenren tsütsü parnok tajangzük angutsü atema Operation Sindoor amshir, ta aitsü.

## Op Sindoor atema Parliament sendenayongtsüla: Mallikarjun Kharge

**New Delhi, June 01** metetdaksü.

**(Agencies):** Amongnü Congress party Tir, Mallikarjun Kharge-i maneni sorkar dang kiralongrartemi Pahalgam amakba aser India-i Operation Sindoor agiba atema Parliament nung temeja senden ka ayongzüksü takhangba agütsü.

New Delhi nung jembidang Kharge-i, Centre sorkaria Pakistan-i inyakba ama inyaksüla, kechiyong Pakistan nungbo India-Pakistan tensa atema jembitsü asoshi Parliament nung temeja senden ayongzüka menogo, ta metetdaksü.

Kharge-i, linük nüburttem ajaki sepaitem pusemer aser linük security dak sendakba onük balala nung longjema dang lir, ta ashi.

Paisa yimtenren lenir ajak dang, sepaitem inyaksangshi nung ajemdaker yimtenren onük maitdaksütsü aser jembishinü kümdangtsü

Ato kilonser Narendra Modi aija Kharge-i, "Kodang kechi jembitsülar asenoki metettsüla. Linük dak sendakba onüktem nung longjema alitsüla aser tsükchirtem akoktsü atema rangloker inyaksüla. Linük security dak sendakba nung lenirtem ajaki ola madoki alitsüla. O mejembidangyongi tatalokbatem tama angatettsüla. Bendang linüktem semdangertem nungi report mangu tashi election nüboyim o mejembitsüla. Ato kilonser Modi-i election onüktem mejembitsüla. Pei sasa pei tenüngsanga mejembitsüla. Linük nüburttem ajak sepaitem den lir," ta metetdaksü.

"Ato kilonseri pei sasa pei tenüng sanga mejembitsüla. Parliament ayongzükdi aser jembidi ta onoki jembia arur. Pakistan-ia Parliament ayongzüka o lemteper. Onok shingaia linük anemabo mejembitsü," ta Kharge-i ashi.



June 01, 2025 nü DMK Tir aser Tamil Nadu Chief Minister, M.K. Stalin DMK senden nung adentsü atema Madurai-i arudang tangokba noksa nung angur.



### Attention:

**Central Govt.  
Subscribers  
Retired Under NPS  
on or before  
31/03/2025**

**UPS  
KÜBOK  
TAJANGZÜK  
BALALA  
ATEMA NA  
TEMSÜA  
LIR**

Payment tali agütsütsü menüngdak, aser nü NPS benefits ji shidak dang alitsü.

Date: 02 June, 2025



### PUBLIC DANG SANGDONGER

31/03/2025 anogo tashi nung mesüra iba anogo matongdang retire asür Subscribers, service nung tajemba agi küm 10 tashi alirtem mesüra pei apuanitemi Unified Pension Scheme (UPS) kübok item benefits tali angutsü akok, tang tashi nung ngua aliba NPS benefits dang nungi tali angutsü akok.

- **Lumpsum payment** (one time) tesüsabuba anguba basic pay nungi one-tenth aser dearness allowance, aser ibaji qualifying service nungi ita trok abensaba shia asütsü.
- **Monthly Top-up** senji NPS kübok admissible UPS payout + Dearness relief (DR) minus representative annuity amount nung ajemdaker latettsü.
- **PPF rates nung ajemdaker simple interest** nung arrears.

### UPS BENEFITS MESHANG

**Physical mode** - DDO semdanga Form agüjang (subscriber atema B2 aser apuani atema B4/B6). Yangi form download süang - [www.npscra.nsdl.co.in/ups.php](http://www.npscra.nsdl.co.in/ups.php)

**Online mode** - online ajanga form fill-up yangi süang [www.npscra.nsdl.co.in/ups.php](http://www.npscra.nsdl.co.in/ups.php)

**Benefits meshitsü atema tatembangbuba  
anogo: June 30, 2025**

For more details, join the webinar at:  
<https://www.pfrda.org.in/index1.cshtml?lsid=546>



Scan this QR Code to know more



## TIR YIMYIM YIMOBILEM (EDITORIAL)

DIMAPUR MONDAY, MAY (AAMI) 02, 2025

### Aotsürtemi ola adokba ya junger !

**N**agaland nung Investment & Development Authority (IDAN) nung inyaker IAS officer ka tenüing agi Reny Wilfred-i pa Noklak nung inyak dang nungi IDAN nung inyak tashi nung pa den külemi inyaker Nagatsürtem dak tim mesüi maksütsü mapa inyakogo ta aija ken o adokba bushisüngdangtsü atema state government-i pa mapa nungi anentsür lia, Dimapur Watsü Telongjemi yimten nung tulus, IAS officer kati tetsürtem dak timi mesüi inyakogo ta taitüsüba ken o ka dang masü saka aika bang nungi adokbaji kanga shisabolutsü aser tetsübutüsü osang ka lir ta metetdaksüba, shitakba, ajak asoshi kanga shisabolutsü mapa ka lir. Atangji, IAS officer-sang jagi Nagatsürtem anemaji shitakba timi mesüi benshi asü mebenshiar, ajibo bushisüngdangertemi dang putettsü aser tesüsa okadak obendangertemi bendangtsütsü. Ajisüaka, shin o nung ashiba ama, mi mali nungbo mokozi madoktsü, anungji temulung malemtsü tuluka lir. Aji oda, tetsür kati dang masü saka tetsür aikati tebur kati parnok dak tim mesüi benshiba ken o temai adoka jembitsüsa atalokbaji odangbo masütsü amai bilemer. Ibajibosa tatem tashi jungjunga bushisüngdangtsüla aser shitakba aibelena lira tangar asoshia tansütsü mapa ka asütsüsa temerenshi agütsütsü tim. Ano, iba ama ken o boluba mapang teshisangdangtsü kaji, tetsür shirnokisa parnok madak ketdangser tulubai parnok dak kanga timi mesüi maksütsüsa benshiogo ta aija metetdaksür, parnok jagi aiben bilemdanger aremer marezmüktet ola adoker alitsü südi, kechiyong pei madak inyaker tuluba anema taitüsüba ken o agütsütsüba nungji, mekümdangra aser okadak temeten mengura takoksa tulu ajurutsü ana nung dang lir. Ajisüaka, item ajakji tizükteta tilartemi tulus anema taitüsüba ken o agütsütsüba yimbazüa yutsütsüla ken o masü. Ashiko, maksü ajurur tetsürtemi tulus anema ken o agütsütsüba nungji tamasabo government nung alirtemi mamang asütsüsa akok, iba jagi tetsür tanur dak tim mesüi benshiba ken o aika adokaka government-i tulursang anema kecha ken o mebenoki mapang talangka toktsüogo. Ibajia tesüngmangtsüka liasü. Ajisüaka, tang danga tulursangji mapa nungi agiena alidang, pa anema taitüsüba ken o agüja aliba bushisüngdangtsü asoshi telemtetba agiba jagi government-ia tetsür tanur ola agashioogo ta mulung anisüngzüker. Iba ama, asen yimten aser lokti nung, talisa, tetsür tanurtem anem inyakba ken o adokdang, senosangertemi zübazülema medoktsüi ola adoktsüla aser iba ama tim masüba mapatem ataloka lira metongshitsü asoshi government nem takangba agüja nokdaksüla. Aji oda, iba ama ken o nungbo talisa tetsürtemi ola adoktsü tim. Atangji, Nagaland State Commission for Women aser Naga Mothers' Association aser ano tang Dimapur Watsü Telongjem ama tongtibang teloktemi ola adokba angashir. Iba jagi ochi obendang angutsüba maparen nung tuluka yaritsü. Aji oda, shibai ashi ? Shibai inyak ? Kechi nisung ? Koyimer ? Kechi kin aser kechi Tzükong ? ta masü saka pai mesüra lai inyakba mapaji tim asü masü (?) ta asüba nung bilemdanga mapang shitak nung telok shitaki ola adokra, alima nung nisung ajak peisasa tazüokba kati arutsü aser alima nung inyakyim ajak shitak kümadoktsü. Koba mapa aser ken o nung südir süaka tongtibang mapa aser ken o tasak nungbo nüngsena agitsüsa adoktsü aser timtem takoksaa ajurutsü, saka tatem nungbo ochibo ochiisa akoktsü. Aji oda, tatishitsüka, asen lima nung taoba kümtem nung ULB nung tetsürtem nem shilem balaka agiteta yutsütsüba onük nunga tetsürtem teloktem karibo tetsürtem asoshi jembir ser nung ola madoktet saka ano tetsürtem telok karibo ola sashia adokogo aser okadak tashii bener ogo aser iba atema parnoka timtem takoksa ajuruogo. Ajisüaka, tangbo ULB nung tetsürtem nema shilem balaka shiteta agütsüba angu dang, timtem takoksa ajurua tasüa majem inyaker tetsürtem nemang tenüngsang agüstür. Iba ama nüngdak ken o nung aiben ola adoktsüsa tensa tia ajurudang nüngsen aser takoks arema ola adoktsüla, kechiyong ola adoktsüba mapang ka dang lir. Aji oda, tetsür tanur mezügmeshiba mapa anema Dimapur Watsü Telongjemi ola agütsüba junger aser kasa olaji, ochi obendang mangu tashi, talisa, tetsürtem telongjemtemi maneni tesashiba –tesashiba agütsütsü imlar.

## OLEMSABANG

### Asen lima nung lisopur tzümar nem amokbangdaksür

~ L. Kika Pongener

Asen kidang asenoki kanga anepalua meima mesutetba Azü (Dog)-i asenok dak angohba ama, asenoki kanga anepalua meima benshiba tzüma-longmartemi asenok dak mapa tamajung inyakba asen lima nung mapang shia denjia arur. Otsüla-oboula nungeri shin o jembia aruba agi....Tzüma-longmarji ita-anogo mabensa chir, yongji parnok dakji temeim aser taochi maket....ta jembia aru. Tzümar-ji asenoki asen jala-jabaso amai anepalua meima mesutetyongjia, parnoki asen ket nung senotsü aser rongsen aliba metetra, parnok tebilemba ataloknudang, parnoki asenokji maochi-i yirutsütsü mesura tepsettsü akok. Asen jala-nula tobur tajung kar parnoki nukshira aser aginura tashiyim agi raksatsütsü aser anir ajentsü akok. Asen Naga nung dak jakla-yimya tajung kaji tzüma-longmar timtemer ajak dang kanga meimer, talisa, Dimapur jila nung meshimetsürtem ajak dang kanga meima senotsü aikasa agütsür. Yongji, asen lima nung meshimetsür aika takar akümer. Meshimetsür ya tapu telemsa aika lir, meshimetsür karbo chichiba mata-mabensa pei sasa kecha meinyaktetba temeimtsü taküm lir. Ano karbo tenuk-telen shitak lir surnung azümesenba agi mata-mabensa amai kümer meshimetsür karbo lir. Ano meshimetsür karbo bendanger asen lima itangiter aser kiralongrar metettsü asoshi (Intelligent) ayuba-a karbo alitsü akok. Anungji asenoki item tzüma-longmar meshimetsür ajak ya kanga chira-pera-a bendanga metettsü kanga tongtipang lir.

Ano akhidang nungi asen lima nung maliba kin ka shirnok tang 'Illegal Bangladeshi immigrants' (IBI) ta ajar, iba kin ya joko küm ishika tejaklen nungi asen lima nung nutsüng aika züina odagi. Ano item kin dang masü tzüma-longmar kin aika asen lima sunga nutsüng yongsuk aika dang küma odagi. Jokorla, asen lima jila ajunga nung shishilempaba mapa ajunga tzümar-temi ajak ajepbangogo. Asen lima nung jila/yimtsüng ajak nung kisujensu mapa aser dekha/hajira mapa ajak tzümar-temi ajepbangogo. Asen Ao lima nunga tzümar-tem aika küma oya-a lia, Ao Kaketshir Mungdang (AKM)-i kanga suoki yia temulong agüja inyakba agi, asen Ao lima Mokochung jila nungbo ILP mapa takok ngua inyaktetogo. Küsaji Naga Students Federation (NSF)-ia temulong agüja inyaka Naga lima District danga nungpo takok ngua inyaka aoba angur. Ajisüaka, tesasatsüka, Dimapur jila temeket nungpo tanü tashi takok ngua meinyakteti lir. Yongji, Dimapur Naga Students Union (DNSU)-i Dimapur nung Inner Line Permit (ILP) reprangshitsü atema sorkar dang mapang shia takhangba agüja arudagi. Anungji iba mapa nung ya sorkar dak dang metaloker meli-i mulongtet telok ajaki tenuk yoka temulong agüja inyaksüla. Dimapur temeküt nung iba ILP mapa ya kodaser tamakok alutsüsa akümer (?)....ta bushidangra, asen Naga nung kin karibo Illegal Bangladeshi Immigrants kin den ya kecha mashishi-i dang kibalembur aser maparen aika nung parnokji hadir amai amshir. Ano Dimapur jila nung balaka tzümar-tem ya sector / colony kar nungpo Gaon-bura dena shima inyakdaksür aser maparen tongti aika nung amshir. Ibajagi Dimapur jila temeküt nungpo iba mapa ya takok ngua meinyakteter sudi ta bilemer.

**(Maneni asüng adok nung...)**

**Iba Olemsabang nung lemsaba ken-o aser shisatsü ya iba ocet züluri bilemba ken-o ama tazünger angateta agitsü mepishir**

## UNGA nung S.Korea nung missionary tem chioktsü takhangba agütsü



UN General Assembly nung South Korea Ambassador to United Nations, Hwang Joon-kook-i North Korea nung meimchir temeden balala anema inyakba metetdaksüdang tangokba noksa nung angur.

**June 01, 2025:** Tang mezüing United Nations General Assembly (UNGA) nung North Korea nung meimchir temeden anema inyakba dak sendakba nung senden ka menogo.

U.N. Headquarters, New York nung 79buba U.N. General Assembly Tir leniba nung amenba senden nungji 2023 küm December ita nung North Korean human rights dak sendakba nung renemba bangzüing ka atema jembia liasü.

UNGA nung South Korea Permanent Representative to U.N, Hwang Joon-kook-i aniba teloki North Korea nung pua aliba South Korea nung missionary tem chioktsü atema takhangba agütsü.

Hwang-, "Küm 20 tejaklen North Korean human rights atema bangzüing renem

tenzüikba sülen tang mezüing UN General Assembly nung iba ama senden amener. North Korea nung kangshia mapa tasak inyakdaksür, tepuokdak ayur, mita repranger, arrtsütem anüker aser meimchir temeden ajak nokdanger," ta metetdaksü.

Hwang-isa North Korea nung pua aliba South Korea nung missionary tem- Kim Jung-wook, Kim Kook-ki aser Choe Chun-gil nung tangsa chioktsü atema UN-i bangzüing ka renemtsüla, ta takhangba agütsü

Hwang-isa North Korea nung meimchir temeden anema inyakba aser raraba hadir yangluba na tsüingda tesendaktep lir, ta metetdaksü.

"North Korea nung nüburtem timtemdakja raraba

hadir yanglur aser item hadirji Ukraine rara nung amshir. North Korea nung nuclear missiles yangluba ya alima tesünep atema amokmeren tuluka lir," ta Hwang-i metetdaksü.

UNGA nungji züingsem linüktema aikati North Korea nung meimchir temeden jenjang tamajungba dang akümba aitsüba den külemi North Korea sepaitemi Russia den amalitepa inyakba atema tebilemtsü akaba lemsatepa liasü.

79buba U.N. General Assembly Tir, Dennis Francis leniba nung amenba senden nungji Ilze Brands Kehris (U.N. assistant secretary-general for human rights) aser Elizabeth Salmón (U.N. special rapporteur on human rights in North Korea) nata densema liasü.

## Zimbabwe nung United Reformed Church küm 400 jungogo

**June 01, 2025:** Zimbabwe linük nung non-conformist Arogotem rongnung tejentiba küm 400 ajungba mong mongogo.

Denomination tejentibatem rongnung tanabuba- Epping United Reformed Church (URC) nung Arogo küm 400 ajungbamong sentong ayongzüka agiogo.

Harare, Zimbabwe nung aliba Arogo nung ayongzüikba sentong nungji kenten sentong, Arogo puti otsü dak sendakba nung o lemtep aser video conferencing ajanga osang balala lemsatepa liasü.

Epping URC nung pastor,

Rev. Karen Knight-i, "Küm 400 ajungba benjungmong sentong kanga junga tenzüker. Iba benjungmong sentong ajanga tesüiba mapangtem bilemtettsü aser teimla tasen nung tarutsü nung rangloker ajemoktsü atema maongka angur. Tsüingremi ashiba angatsü aser Tanela Temeshi nem anidaktsütsü atema renema dang lir," ta ashi.

Arogo küm 400 ajungba nüngtem nung Arogo nung putir Jeremy Flack-i züluba kaket ka Arogoi sayaja liasü.

Arogo küm 400 ajungbamong sentong nungsa

akhidang lenirtem- Jeremiah Dyke aser Nathaniel Ball nati Arogo tenzüikba exhibition sayuba den külemi 1839 küm iba Arogo nung kaketshir ka, David Livingstone-i sayutsüingiba aser 1925 küm Arogo küm 300 ajungba mapang Dame Margaret Lloyd George-i Arogo semdangba noksatem saya.

Kasa sentong nung osangtajung ken mejemer nüngtugu aser 1970s nung iba Arogo nung pastor inyaker Rev. Bryn Rees aser 1997 küm iba Arogo Tenla ki tanaben süshiba noksatem sayaa liasü.

## Delhi nung court-i Khristan sepai officer ka anema obendang agütsü

**June 01, 2025:** India nung Khristan yimsü amanger Army officer kati pa indang regiment nung Hindu nung tekülem ki aser Sikh nung gurudwara nung külemküja nung shilem agitsü memelungba agi mapa nungi anenja liasü, aser tawa court katia pa anema obendang agütsüogo.

Delhi nung aliba court nung obendangertemi, Sikh Squadron nungi Khristan, Lieutenant Samuel Kamalesan-i pai amangba yimsü benshitsü temeden lir, ajisüaka Commanding Officer ka ama pai khuret tali abentsüla, ta ashi.

Küm ishika tejaklen

Kamalesan-i regiment nung hopta shia agiba Puja sentongtem nung shilem agitsü memelung. Puja nung shilem agibaji Khristan yimsü dak mapet ta shia pai shilem agitsü memelungba sülen 2021 küm pa dang nungi temaba ketdangsertemi pa mapa nungi anenja liasü.

Pa dang nungi temaba ketdangsertemi aiben pa dang item puja nung shilem agitsü mepishi saka pai memelungba agi tatemsa pa mapa nungi anentsü.

Temepishiba ken o angadangba mapang nung court-i, iba ken o ya tamangba

yimsü temeden dak sendakba ken o ka masü saka temaba ketdangsertem tetuyuba tashi mangaba ken o ka lir, ta metetdaksü.

Court-i, "Commanding Officer temi telemsa adokdaksüba agi masü saka tatishitsü tajung sayua lenitsüla. Unit ka dang nungi nija ka yimsü tongtibangba kümdaktsü," ta ashi.

Lt Kamalesan ya 2017 küm Indian Army nung commission süa liasü. Pai pa tanaben army nung anioktsü court dang mepishi, ajisüaka court-i pa temepishiba magizüki pa anema dang obendang agütsü.

## ANOGO ABEN TSÜNGREM DEN

### Ilungang Tsüngrem (T.Ken 80:1-5)

Tsüngremi ne taküm nung meilungi inyaka ali asü? Dawid den Pa yamaji liasü. Iba ken ya Sauli Dawid timtemdaktsü dang zülu. Aji asünung pai ayimten, "Kibuba, kechiba nai kecha meinyaker. Na kanga meilungi lir."

Tsüngremi meimba indang nai shisadanga lir ma? Pai kodanga mariteper, saka kodang Pai mapa inyaktsü tenzüker, repranga liang. Dawidi mepishi, "Ilungang, ilungang" (t.1). Pai pa temepishiba tekong 5 nung lephsia ashi: "Saka ni sensaker aser anünga lir; kü dangi kara arung, O Tsüngrem: Na kü teyari aser kü kümzüikba; O Kibuba menua teli."

Tsüngrem mapa inyaker masü, menur ama süra, nai kechi inyaktsü? Pa bushiang aser Pa dang ataa liang aser Pa meimang. Tekong 4 kanga tobur junga shia lir: "Shiri na bushir parnok ajaki peladakjang aser ne dak temulung süngzükdakjang; aser shiri ne teküzmük meimer parnoki maneni Tsüngrem tushidakjang" (T.Ken 69:30).

Yangi asenok asoshi lesson tajung ka lir. Kodang asenok bilemba ama Tsüngremi mapa meinyaklir, kodang asenok mapang metsükteplir, asenoki kechi inyaktsüla? Pa dang pelaang, Pa meimang aser Pa tushiang. Mapang atema Pa tebilemtsü südakjang. Tsüngremi teti mapa ajak tajung asoshi inyaker (Rom 8:28). Saka Pa takok jungkai adoktsütsü asoshi mapang shidakji ataa alir. Pai anü tetsüji reprangdakjang.

Tsüngremi menubaji ne jakla yangluba yim nung shilem ka lir. Tanabuba mapangji Tsüngremi na manidaktsür, Pai kodanga na asoshi mapa inyakba manener ta bilemteta tasü itang, aser Pai kodang koda na yaritsü metetta lir. Pa mapang nem aser Pai anebaluba nem bendanga agüjang.

## Nepal ya Hindu linük ta sangdongtsü akhangba agi Khristantem shisabulur

**June 01, 2025:** Nepal nung asentenshir Chubai yimsüsüba amenoktsü aser Hindu linük ta sangdongtsü akhangba agi Khristantem kanga shisabulur.

Taoba mapang Nepal chuba pusemer meyrjang aika tan hopta linük yimtiba, Kathmandu nung adenshir sorkar balala dang mepelaba sangdonga liasü.

Nepal nung 'constitutional monarchy' tanaben amenoktsü atema takhangba agütsür. 'Constitutional Monarchy' ya 2008 küm agiena liasü. Küm 239 tashi Chubai dang yimsüsüa arua liasü saka 2008 küm nüburtemi hopta aika longkak aita aruba sülen agien.

Iba mapang nungjisa Hindu nütsüing teimba aliba linük ya secular republic aküm.

Osangbener den jembidang Open Doors nungi Megan Titley-i, "Nüburtemi sorkar dang mepelar. 2008 küm nungi sorkar 13 tashi melentepa aruogo aser ochimashi agi nüburtem laaktetogo. Nüburtemi maneni timtem ajangshir," ta metetdaksü.

"Tang nüburtemi chuba

yimsüsüba benoktsü aser Nepal ya maneni Hindu linük akümtsü akhanger; ibaji ajanga nüburtem timtem anentsü ta parnoki bilemer.

Ajisüaka Khristantembo ibaji ajanga shisabulur, kechiyong India nung tatalokbatem aser Hindutva tangatetba indang parnoki meteta lir. Ibaji ajanga Hindu nungertem kanga tajangzüik angutsü saka Muslim aser Khristantembo reshikangshitsü," ta Megan-i metetdaksü.

"Hindu linük, ta sangdongba ajanga Khristantem anema ano taliba inyaktsü, ta Khristantemi shisabulur," ta laisa metetdaksü.

Alima nung Khristan nütsüing kanga kera ainba linüktem rongnung Nepal densema lir. Tang Nepal nung Khristan nütsüing million 1 nungi million 3 tashi alitsüa akok. Nepal nung Khristantem teimbaka Hindu yimsü toktsürtem lir.

Nepal nung tesüsabuba Chubaji arrshi küm 77 Gyanendra liasü.

**AO OSHI ANGAZÜKDAK:****TANÜ ANGAZÜKTSÜBA OJANG****Tenji**

(v) meimlai lia ajuru (meet unexpectedly)

\* Ni mapai aodang lenmang nung ozü medemer tenji.


**Tenla**

(n) angati agütsüba (donation)

\* Watibai arogo nem tenla tulu agütsü.



Tir Yimyim

**OLONG PAITEP # 7169****TIPIEN**

2. Sü jeplok  
4. O agi merenshi  
7. Ayongküm li  
8. Chiyungtsü mapang süiadok  
9. Tsüngrem den jembiba  
12. Saklok  
14. Samaba mebushitet  
15. Mejanga onü  
16. Tzü shiruru ka

-

(4)

-

(5)

-

(5)

-

(4)

-

(9)

-

(4)

-

(5)

-

(5)

-

(4)

**LANGTSÜNGLEN**

1. \_\_\_\_\_ i  
3. Kasa masü  
5. Nüchi masü  
6. Tashi endok  
9. Langtem  
10. Anü malidang  
11. \_\_\_\_\_ kibur  
13. Tebur tembar tsüngda jatepba

-

(4)

-

(6)

-

(5)

-

(5)

-

(5)

-

(6)

-

(5)

-

(4)

**OLONG PAITEP # 7168 TELANGZÜBA****TIPIEN :**

1. Semtu, 3. Lepko, 5. Bilem, 8. Ulu,  
10. Tsüngpang, 11. Tesangwa,  
13. Aoksa, 15. Putir, 16. Yipru.

**LANGTSÜNGLEN :**

1. Sayu, 2. Teb, 4. Kimong,  
6. Lungkak, 7. Milak, 9. Zünga,  
10. Temopu, 12. Walu, 14. Ali.

**NAI-A YA METETTER MA**

United Arab Emirates (UAE) Father of the Nation, Sheikh Zayed bin Sultan Al Nahyan nem tetushi agüja yangluba portrait ka ajanga world record yanglutetogo. Iba portrait ya Golden Arabia Jewellery aser Yogesh Jewellery Factory yaritepa 21-karat gold ajanga yanglu aser Sheikh Zayed indang noksa den seven emirates ung tongtipang nüngshilung ajak keta lir. Middle East Watch and Jewellery Show nungiba portrait sayua liasü aser Guinness World Records-i "world's largest gold frame" ta kuli agütsüogo.

**COCOMI-i tzümetzüng tensa atema lungkak aitiba anena atar**

**Imphal, June 1, 2025 (Agencies):** Meitei telok balalai tentetba COCOMI-i lungkak aitiba ajak anena atatsü metetdaksüogo. Manipur nung tzümetzüng tensa ajurua aliba dak rangloker parnoki lungkak aitiba anena atatsü lemtet.

"Public nem timtem talila magütsütsü atema onoki lungkak aitiba sentongtem khen atema

anena atar" ta Coordinating Committee on Manipur Integrity (COCOMI) convenor Khuraijam Athouba-i ashi.

"Ajisüaka sorkar telangzüba junga asadangba sülen lungkak aitiba sentongtem tenzükshitsü. Tsüngsang tajungba akümba den tongti civil society bodies aser public den asüngdangteper maneni lungkak aittsü" ta pai ashi.

Gwaltabi tatalokba atema Governor Ajay Kumar Bhalla-i yimjak nung tatok meshitsü aser Chief Secretary, DGP o security advisor tem mapa nungi anendaksütsü atema COCOMI-i takhangba agütsür.

Tesüiba anogo ishika Meitei nunger teimba ser aliba Imphal Valley nung nübortemi kanga lungkak aita aruogo.

**Assam Opposition-i 'arms licence policy' aitsür**

**Guwahati, June 1, 2025 (Agencies):** Assam sorkari talenba tesashi maliba arms licence policy ka yangluba atema opposition lennirtemi aitsür.

Iba lemtet ajanga public nung telemsa adoktsü aser state nung yimjung tensa raksatsü. Anungi Centre-i iba lemtet meyipa agidakjang ta opposition lennirtemi ashir.

Assam sorkari meta talang pilar aser lendong ataloktsü ana nung aliba lisopur nem arms licences agütsütsü ta Bodbarnü metetdakja liasü.

"Tesem kar nung Assamese nunger tsübuseta alir aser parnoki mapang tatsüka arms licences meshia arur. Bangladesh nung ajurua aliba tensa aser state sorkari tawa

bendangertem anema inyakba ajanga arrtsülen aliba lisopurtemi parnok dak lendong ataloktsü tsübur" ta Chief Minister Himanta Biswa Sarma-i ashi.

Sorkari tagütsütsüpur nem licence agütsütsü, parnok ya original inhabitants asütsüla aser lisopurtem asütsüla ta CM Sarma-i ashi.

"Iba ozüng alema inyakba mapa ajanga Assam nung yimjung raksatsü" ta Leader of the Opposition Debabrata Saikia-i ashi.

Centre-i iba policy meyipa agidaktsütsüla ta Saikia-i Union Home Minister Amit Shah aser Union Minister of State for Law and Justice Arjun Ram Meghwal dangi shiditem

züluogo.

Sorkari iba lemtet agiba ya ketdangsubaren nung tamakok anguba lir. Iba policy ajanga telemsa adoktsü aser armed factions tasentem adokdaksütsü akok ta Saikia-isa ashi.

"Kin telemsa yur civilians nem prangpong agütsüba ya lendong jaokba lir. Assam sorkari vigilante justice ajungketba ajanga ozüng amertem pusema inyaksangshiba nungi pilaba sayur. Prangpong bener yimjung bener marutettsü ta parnoki bilemtettsüla" ta paisa ashi.

"Arms licences agütsüba lemtet ya police aser Border Security Force (BSF) mezüngmeshiba lir" ta Trinamool Congress (TMC) MP Sushmita Dev-ia ashi.

**Manipur nung KYKL & KCP-PWG züngsemtem apu**

**Imphal, June 1, 2025 (Agencies):** Manipur nung Central aser state forces-i Kanglei Yaol Kanna Lup (KYKL) züngsem 3 aser Kangleipak Communist Party - People's War Group (KCP-PWG) züngsem ka puogo.

Security forces-i parnok ket nungi prangpong aser electronic devices aika puogo ta osang angazüker.

Parnok yagi Valley District tem nung tashiyim agi sen saru aser nisungtem pur ao ta ketdangsur kati ashi.

Osang tejangja ka angazükba sülen Leimapokpam nung mita aodang KYKL züngsem 3 apu.

KYKL züngsem asem ya Chungkham Raju Meitei (40), Laishram Gandhi Meitei (41) aser Chingtham Premchand

Singh (40) nunger ta jangjaogo.

Parnok ket nungi 9mmpistols, mobile phones aser SIM cards ngutetogo ta ketdangsurisa ashi.

Maneni, sepaitemi Yumnam Huidrom area nung mita aodang KCP (PWG) züngsem Sapam Dhanajit Singh (42) apu.

Pa ket nungi mobile phone, SIM card, wallet, Aadhaar Card, Election Card, aser PAN Card ngutetogo ta ketdangsurisa ashi.

**COVID-19 cases detected in Mizoram after 7-month gap**

**Guwahati, June 1, 2025 (Agencies):** Mizoram nung nisung ana dak COVID-19 puteta lir aser October 2024 sülenbo tang mezüng atema COVID puteter.

Nisung anaprong ya Zoram

Medical College and Hospital (ZMCH), Aizawl nunganepaludar.

Mizoram nung COVID-19 wara adokbaji October 2024 nung nisung 73-i COVID-19 menaba liasü.

Mizoram nung Integrated

Disease Surveillance Programme (IDSP)-ia public health advisories agütsüogo. Parnoki nübortem dang süngjema alitsü aser COVID-19 safety measures sülen anidaksü ayongzükogo.



Arunachal Pradesh kübok Bana-Seppa Road nung anentsüh tulu kati gari ka anenzüka bener aoba sülen agiba noksa ka angur. Iba lendong nung kibong ana nungi nisung 7 asü. Tasürtemji Sankar Aka (Sanju Badi), pa kinungtsü Tasum Badi, aser tanur Kachung (5) o Nicha (2). Ano Sichi Yame aser pa mashisa kinungtsü den tanur ana asü.

# Sheikh Hasina-i tasa junga yanglur longkak aiter amak

**Dhaka, Aami/June 01 (Agencies):** Linük yutsür jenshia senzüa alila taoba ato kilonser Sheikh Hasina-i ketdang süa lar sorkar anema longkak aiter nokdangtsü asoshi junga yanglur inyak, ta taoba küm lai nüburtem anema ozüng tesashi amshiba ken o jembi tenzükdang Bangladeshi prosecutors temi ashi.

"Kuli kanga junga asadangba sülen, ibai kanga junga osang agitepa, tesem ajaklen tasa junga yanglur inyak ta onoki angatet," ta Bangladesh indang domestic International Crimes Tribunal (ICT) nung chief prosecutor Mohammad Tajul Islam-i Deobarnü okadak pa o tenzüka ashi.

"Tai tonglokja aliri law enforcement agencies aser lar armed party members ajunga amshia sorkar anema nokdaker ajemreptsü merang," ta Islam-i ashi aser arishi küm 77 tain taoba lenir aser ano ketdangsür anati kaketshir temi anir sorkar anema nokdakba mapang mapa tamajung inyaktsü ajungmeso, tensa tebenja kumdaktsü, yari, tasa yanglu aser nisung aika tepsetba menokdangtet, ta aitsü.

Longkak aiter ola madokdaktsütsü asoshi Hasina'er sorkari tashiyim

amshia July aser August 2024 tsüngta mera balala agiba mapang Bangladesh nunger 1,400 jungnüa tepset ta United Nations-i ashi. Iba mapang nisung tepsetba ya lai meimchir anema mapa tamajung inyakba lir ta Bangladesh-i aitsü.

Hasina ya India nung jenoka lir aser item taitsüba ya yimtenren tsütsü nungi la anema inyakba lir ta ashir.

Linük tesem ajunga nung longkak aitba sülen la taoba küm August ita helicopter ka nung New Delhi-i jena ao aser la kisüngi küm 15 yimsü asüba asüba tembang. Lai küm 15 yimsü asüba mapang opposition lenirtem, la anemertem dak tenük yoker nisung tepseta meimchir temeden nung aibelen, ta tai tongloktüsü.

Iba sülen la Dhaka-i meyipa arutsü aser aputsü ozüng agütsüba tashi mangai jenshia senzür.

ICT yagi taoba Interior Minister Asaduzzaman Khan Kamal aser taoba police chief Chowdhury Abdullah Al-Mamun densema Hasina sorkar aser lar indang tangbo shibanger aliba Awami League party nung sendaktepa aliba ketdangsürtem anema ken o benoka jembir.

Hasina'er sorkar

atsüngdoker tenzükba interim government-i June 2026 matongdang elections agitsü nangzüka lir.

Prosecutors temi Hasina ken o nung parnok report ya taoba ita agütsü aser court-i la anema Deobarnü ken o benoktsü imlar.

Bushisüngdangter temi video footage, audio clips, Hasina-i phone ajanga sensaksemba, helicopter indang records aser drones senzüsempingba aser lar sorkari tashiyim amshia merenshir alirtem nungi kuli bendenogo.

ICT yagi taoba sorkar dak sendakba mezüng trial ya May 25 nü tenzük. Iba ken o nung police ketdangsür parnok nisung ti-i Hasina linük yutsür jena aoba anogo, August 5, 2024 nü longkak aiter nisung tepsetba ken o benoka lir.

1971 küm nüchiso asoshi Bangladesh-i raraba mapang Pakistan army temi mapa tamajung inyakba bushisüngdangtsü atema ICT ya Hasina-i 2009 küm kumteta liasü.

Iba tribunal yagi political opponents aika nem tasüba temerenshi agütsü aser aikati ibai Hasina-i la anemer samatsütsü asoshi amshir ama züngshia aru.

# Ukraine indang drone-i Russia telung nung tesem aika amak

**Kyiv, Aami/June 01 (Agencies):** Deobarnü Ukraine-i Russia nung drone amshia kanga sashia amak, koba tanü tashinung Kyiv indang operation tulutiba ta züngshir aser Russian airbases pezü nung tenük yoker amak ta ashir.

Ukraine Tir Volodymyr Zelenskyy indang taoba press secretary ajanga social media X nung Russia amakba indang video tatsüka lemsatet aser Ukraine indang Security Service (SBU) ajanga drone amshia kanga sashia amak aser Russian military aircraft 40 dak tema raksatsü ta ashi.

Laisa iba mapang A-50 early warning aircraft, Tu-95 strategic bombers, aser Tu-22M3 long-range bombers desema jenjang tulu aketba tayimtsü tem dak tenük yoker amak ta ashi.

Teraksatsüba ya USD 2 billion dak tema indang alitsü, anungji rara tenzüker Russia indang air assets nung "most expensive single attacks" alitsü ta lai X nung ashi.

Social media video balala nung drones ya Russian airbases leni aoba nguogo. Mapang tatsütsü lir anüngleni

mokozü atu aser tesem balala nung mi adoka apokba angu.

Video ka nung drone ka anena aliba tayimtsü nung oa atsük aser second ishika lir mi adok aser mokozü agi lungbanga liasü.

Ukrainian media ajanga ashiba agi, iba operation nung Ukraine nungi kilometre 4,300 shi pilar Irkutsk Oblast nung aliba Belaya airbase densema Russian territory telung nung airbases tem amak.

Ukraine nungi kilometre 2,000 shi pilar Murmansk Oblast nung aliba Olenya airbase nunga amak ta media osang ajanga ashir. Item tesemtem nung apokba aser mokozü adokba video balala X nung sayuogo.

Moscow den indang-indanga yimjung ken o jembitsü asoshi Kyiv-i delegation ka Istanbul-i Hombarnü yoktsü ta Ukraine Tir Volodymyr Zelenskyy-i shir ghonda ishika lir iba ya atalok.

Iba delegation ya Defence Minister Rustem Umerov-i anir aotsü, ta Ukraine tiri Telegram nung sangdong ka agütsü.

"Asen independence, asen linük aser asen nübur kumzüka ayutsü asoshi onoki mapa ajak inyaker," ta Zelenskyy-i ashi.

# Ceasefire sentong benokba ajanga Gaza rara anentsü tenangzükb magütsür: Hamas



**Cairo, Aami/June 1 (Agencies):** Ceasefire atema United States-i benokba dak sendakba nung Hamas-i telangzüba agütsüogo, ajisüaka iba telok nungi lenir kati ashiba agi, ceasefire atema benokba onüktem ajanga rara tembangtsüba tenangzükb magütsür.

Al Jazeera den Honibarnü sensaksemba mapang Basem Naim-i ashiba agi, hopta ka tejakdang Witkoff den mulungtepba onük dang nungi balaka süaka US special envoy Steve Witkoff-i parnok nem tawa agütsüba onüktem dak sendakba nung Hamas-i odang telangzüba agütsüogo.

"Hopta ka tejakdang onoki Witkoff den onük ka

mulungtepa agizükogo aser onoki iba ya agizüktsü koka lir aser negotiating paper ka ama agitettsü ta shiogo," ta Naim-i ashi. "Pa Israel dangi ao aser parnok telangzüba meshi. Onoki benokba onük atema telangzüba agütsütsü melena pai onük tasen ka bener aru, koba onoki mezüng mulungtepba den sendaktepa maliasü," ta paisa ashi.

Honibarnü sangdong ka ajanga Hamas-i ashiba agi, parnoki Witkoff nem telangzüba ka agütsüogo aser parnoki benokba onük nung teti atema ceasefire benoktsü, Gaza Strip nungi Israel nunger sepaitem atsüngintsüba aser Gaza nung Palestine nunger dangi teyari kecha tetsükdaktsü makai yoktsüba densema liasü.

Hamas-isa, tenangzüktepba nung shilem ka ama Palestine nunger tepuokertem melena parnoki pua aliba Israel nunger 10 chioktsü aser iba den Israel nunger tasü mang 18 agütsütsü, ta shiogo.

Witkoff-i, Hamas-i telangzüba agütsüba ya agizüktsü makok ta shiogo.

"Hamas-i sensaksem atema onoki benokba onüktem ya agizüktsüla, koba taruba hopta tenzüktettsü," ta Witkoff-i ashi.

"Iba ajanga taruba

anogotem nung anogo 60 atema ceasefire asoshi tenangzüktepba ka yanglutettsü aser iba mapang Hamas-i pua alir taküm alirtem tesadang aser asürtem parnok kinungertem dangi meyipa arutettsü aser iba dak ajemdaker teti atema ceasefire benoktsü asoshi tenangzüktepba ka yanglutsü merangtsü.

Kasa mapang nung Israel Ato Kilonser Benjamin Netanyahu-ia Hamas telangzüba aitsüogo. "Witkoff-i ashiba ama Hamas pur telangzüba ya agizüktsü makoktsü aser iba ajanga ken o atsüngzükdaktsütsü. Pua alirtem meyipa anir arutsü aser Hamas pur samatsütsü atema Israel-i maneni jenjang agitsü," ta Netanyahu-i ashi.

2023 küm October ita nungi tang tashi nung Israel-i Palestine nunger 54,000 dak tema tepsetogo aser kasa mapang nung Israel-i hopta aika tenüngdakba oset kecha bener meyoki tenokdangba agütsüba sülen Gaza ajunga nung nüburtem yatzür agi menepogo. Israel-i May ita tom nungi teyari terara yoka arudar.

Teti atema tenangzüktepba ka yanglutsü asoshi timla sama aoba mapang ka nung Gaza

nung yatzür aser nüburtem animesüngzüktetba tali küma odar, kechiyong Israel-i ita ana tashi teyari kecha meyoki nokdanga ayuba sülen tang teyari terara yoka arudar.

Gaza nung alir nütsüngyongsük million 2.3 ya ayawara agi meneptsü ana nung lir ta UN-i Hokolbarnü tekümdangtsü metetdaktsüogo. Palestine nunger pongu nungi kabo yatzüra agi menepogo ta May tom nung ashiba sülen US-i tang iba olen lemsatetogo.

World Food Programme (WFP)-ia ceasefire benoktsü atema maneni ayongzükbago, kechiyong ceasefire benokba ajanga dang yaseta aliba Palestine nungertem nem chiyongtsü agütsütettsü. Gaza nung alirtem ita ana mesütsü atema WFP-i Gaza indang arrtsü nung chiyongtsü renemer yua lir.

UN indang food agency-i ashiba agi, parnoki Hokolbarnü Gaza-i truck 77 nung flour bener aru, saka parnok ya yaseta aliba pei kibongtem mesütsü merangertemi sota liasü.

US aser Israel nati nongitba Gaza Humanitarian Foundation (GHF)-i maneni teyari balala lemdar, saka iba ya teyari agütsüba teloktemi aija arudar aser ashiba agi, parnoki

humanitarian principles tem anema inyaksangshitsü akok aser chiyongtsü kanga mejungi nüngdaka alirtem nem chiyongtsü agütsüba militarise asütsü akok. Gaza Government Media Office-i ashiba agi, iba hopta Palestine nungertem teyari agitsü merangba mapang Israel nunger sepaitemi Palestine nunger 10 tepsetogo.

Iba amala tia tensa ka nung Israel army-i Gaza maneni makdar aser Gaza civil defence otongdari ashiba agi, taoba ghonda 48 tsüngda Gaza City aser Gaza north nung ki 60 shi dak bomb pokloktsüogo.

Honibarnüa Gaza kübok tesem balala nung Israel-i bomb pokloktsüba mapang Palestine nunger 20 tepsetba osang agütsüogo.

Israel-i March ita ceasefire benoka aliba nungi atsüngina Gaza maneni amak tenzükba sülen Palestine nunger 3,900 tepsetogo.

Maneni Hokolbarnü nungi Israel army-i southern Khan Younis, Bani Suheila, aser Abasan nunger alirtem dang pei aliba tesem toktsür aotsü tetuyuba agütsüogo.

UN-i ashiba agi, taoba hopba ana kija nunga nisung 200,000 shi pei talidak ki toktsür jenshiaogo.

## Champions League final: PSG-i goal 5-0 agi Inter Milan kokogo



**Aami/June 1, 2025 (Agencies):** Paris Saint-Germain (PSG)-i Honibarnü Champions League final nung Inter Milan goal 5-0 agi koka tang mezügbuba iba asayamung kokogo.

Final asaya nung Luis Enrique-i aniba team yagi asaya amokbanger asayar aser lanur asayar Desire Doue-i goal ana tashi idakja iba asayamung 1956 küm tenzükba sülen final asaya ka nung parnoki goal timtiba agi asaya kokogo.

Achraf Hakimi, shiba pa taoba mapang asaya aliba club den asaya liasü pai mezügbuba goal minute 12buba nung idaktsü. Iba sülen Doue-i metsüba ball ka Federico Dimarco dak tsükdaker ia minute 20buba nungbo parnok goal 2-0 agi tejakdang aküm.

Iba sülen Doue-isa asaya tanabuba shilem nung minute 63buba nung par team atema tasembuba aser pa asoshi tanabuba goal idakja parnok jenjang kanga junga aküm aser

asaya akoktsü temulung lemteta kuma liasü.

Inter atema ano timla samadakja minute 73buba nung Khvicha Kvaratskhelia-i goal pezübuba idaktsü aser substitute Senny Mayulu-i minute 86buba nung goal pongububa idakja parnoki asaya ayong ayonga koka liasü.

Asaya tepeyong Inter puri junga masayateti timtema liasü. Küm 70 tejakdang European Cup aser Champions League tenzükba sülen PSG-i takok anguba ya ajak dang goal timtiba agi takok anguba lir.

PSG indang Qatari kiburi küm aika rongsen intoka team yangluba sülen tang takok ngutetogo. PSG puri iba asayamung makok tsüngda parnoki 2020 küm dang final tongteter liasü, saka iba küm parnok final nung Bayern Munich-i akok. PSG-i iba season French league aser cup naprongla koker liasü.

Parnok ya Marseille sülen Champions League akokba

French club tanabuba lir. Marseille-i 1993 küm Munich nungsa AC Milan koka liasü.

PSG coach Luis Enrique-i tang agi tanabenbuba Champions League kokogo. Pai küm 10 tejakdang Barcelona nung inyakba mapang CL koker liasü. Tang PSG squad ya küm ana yangluogo aser Kylian Mbappe-i club toktsüba sülen iba team tentetogo.

Doue, shiba Mongolbarnü küm 20 ajungtsü lir pai final nung tangar ajak dang nungi alakteta kanga junga asayaogo.

Inter Milan asoshi tesasatsüka Champions League pezübuba akoktsü maongka liasü saka magitet. Parnoki tatemsa iba asayamung 2010 küm kokogo. Coach Simone Inzaghi-i küm asem tsüngda Inter puri final ana tashi tonga aniogo, saka anabenprongla takok mongutet. Parnoki taküm Serie A title-a mebentet aser takok marok ka danga mongui season tembangogo.

## Asian Athletics C'ships: India tanabuba jenjang nung tembangogo

**Aami/June 1, 2025 (Agencies):** Gumi, South Korea nung asayaba 2025 Asian Athletics Championships nung India team tanabuba jenjang nung tembangogo.

Honibarnü tatembangbuba anogo India nunger asayartemi gold medal ka danga mongutet, saka parnok tasembuba jenjang nung aliba Japan jakdang aser China sülen tanabuba jenjang nung tembangogo. Iba asayamung nung China-i medal timba ngua liasü.

2017 küm Bhuvaneshwar nung mezügbuba jenjang nung tembangba sülen Asian Athletics Championships nung India team taküm jenjang tajungba nung tembangogo. Parnok 2019 küm pongububa aser 2023 küm tasembuba jenjang nung tembanga liasü.

26th Asian Athletics

Championships Medal Tally:

**1st:** China: 19 gold, 9 silver, 4 bronze

**2nd:** India: 8 gold, 10 silver, 6 bronze

**3rd:** Japan: 5 gold, 11 silver, 12 bronze

Animesh Kujur-i 200 m asemtepba nung alizüing 20.32 seconds nung tongteta national record ka yanglu aser Parul Chaudhary-ia tetsür 5000 m asemtepba nung tanabuba silver medal ngua liasü. Ajak senteper India team-i tatembangbuba anogo silver medal asem aser bronze medal asem ngua ajak senteper medal 24 angu, kong gold medal ti densema liasü.

China-i ajak senteper medal 32 anguba nung gold medal 19 densema liasü aser Japan-ia ajak senteper medal 28 angu saka gold medal pongu dang

ngua liasü.

India nunger rongnungi Gulveer Singh-i kanga junga asayaogo aser pai 5000 m aser 10000 m naprongla nung gold medal angu aser 5k asemtepba nungbo iba asayamung record yanglua liasü. Avinash Sable-ia 3000 m steeplechase nung gold medal angu.

Tetsür tetoktepba nung 4x400 m relay nung gold anguba den Jyoti Yarraji-i 100 m hurdle, Pooja Singh-i high jump aser Nandini Agasara-i heptathlon nung gold medal ngua liasü. India-isa 4x400 m mixed relay nung gold medal nguogo.

India team-i ano tebur 4x400 m relay aser tetsür 4x100 m relay nung silver medal angu aser Sachin Yadav-ia tebur javelin asaya nung silver medal nguogo.

## PHF-i taruba Asia Cup tanga tesem ka nung asaydaktsüner

**Aami/June 1, 2025 (Agencies):** Pakistan Hockey national team nem visa magütsüra taruba Asia Cup ya India nung masü saka tanga tesem ka nung asayatsü atema mepeshitsü sentong aliba Pakistan Hockey Federation (PHF)-i metetdaktsüogo.

Iba continental asayamung ya India nung August tatemlen aser September ita tetenzüklen asayatsü renema lir, aser iba asayamung nung takok angurtem taruba küm Europe nung World Cup asayatsü aliba atema indang indanga qualify asütsü.

PHF otongdar kati ashiba agi, Asian Hockey Federation aser local organizers temi parnok nem visa agütsütsü ta tezüluba nung tenangzükba agütsü nungdang federation-i iba asayamung nung shilem agütsü atema asadangtsü.

"Linük ana tsüngda tesendaktep mejungi liaka vasa dang agütsütsü nangzükra onoki India nung oa asayatsü atema ozü sorkar dang temelaba meshitsü," ta pai ashi.

"Ozü sorkari kechi tetuyuba agütsüdir iba sülen onok anidaktsü, saka asaya aser

yimden yimsüsüba na bendanga ayutsüji Pakistan indang policy lir," ta paise ashi.

Kiralongrartemi Kashmir kübok Pahalgam tesem maka alima penzür 26 tepsetba sülen linük ana tsüngda taoba ita mangatettep tulu adoka kati ka maktepba sülen tensa mejungi aliba mapang ka nung tang PHF-i iba olen ya lemsatapa liasü.

Pakistan team Asian Cup nung shilem agütsüba dak sendakba nung Hockey India dang parnok sentong kechi ta asüngdang mapang, sorkari kechi tetuyuba agütsüdir iba sülen parnok anidaktsü ta telangzuba agütsüogo.

Kasa mapang nung PHF-isa, asayartem security dak sendakba nung süoki ia bilemba lemsatapogo aser ashiba agi, asayamung nung shilem agiba team ajak kümzüka toktsütsüji asayamung ayongzükba linük khuret lir.

Pakistan team taoba Olympic Games ana tashi atema qualify masü aser taoba Hockey World Cup nunga shilem magitet, saka parnok dang iba asaya nung jenjang yanglushitsü merangdar.

## French Open: Tommy Paul aser Svitolina na Quarter-i iogo

**Aami/June 31, 2025 (Agencies):** America nunger nüngtugu tennis asayar Tommy Paul-i Deobarnü French Open tebur kija asaya nung Australia nunger asayar Alexei Popyrin koka quarterfinal-i iogo.

Deobarnü asaya nung Paul-i 6-3, 6-3, 6-3 agi Popyrin madak takok ngua iba clay court asayamung quarterfinal tongtetogo, aser pa ya Andre Agassi-i 2003 küm Roland Garros nung quarters tonga asayaba sülen America nunger tebur asayartem rongnungi iba asayamung quarter tonga asayaba mezügbuba asayar kümogo.

Kasa asayamung tetsür kija asaya nung Ukraine tsür Elina Svitolina-i Italy tsür Jasmine Paolini koka quarterfinal tongtetogo.

Court Philippe Chatrier nung arishi küm 30 tain Svitolina-i mezügbuba set mekokaka kanga meranga asayar Italy tsür la ya 4-6, 7-6 (8/6), 6-1 agi koka taruba round tongtetogo.

"Ni asaya akokba ya tang tashi mamangteter," ta Svitolina-i ashi.

"Tanü asaya kanga tasak liasü, kechiyong Jasmine-i kanga junga asayaogo. Kü atema asaya temela masü asü saka ni süngjemershi tatembangbuba point tashi meranga asayaba atema kanga pelar," ta lai ashi.

"Asaya kanga tasak liasü saka ni tanabuba set koktetba atema kanga pela liasü," ta Ukraine tsür la yagi ashi.

Svitolina quarterfinal nung Iga Swiatek aser Elena Rybakina na asaya takoker den asayatsü.

Kasa asayamung tebur tarep asaya nung India nunger nüngtugu tarep asayar Rohan Bopanna aser pa indang Czech partner Adam Pavlasek na Fin Harri Heliovaara aser Brit Henry nati tsükdaktsüogo.

Iba asaya ya Fin Harri Heliovaara aser Brit Henry Patten nati 2-6 6-7(5) agi straight game nung koka liasü.

## BILEMDANGANG

**"Timla agi nisung ka tejakleni aotsü ajungmesor."**